

II Concurso Literario Mazarelos

Co obxectivo de fomentar a creatividade da mocidade universitaria e de desenvolver a súa capacidade de expresión en lingua galega, así como para contribuír a descubrir potenciais figuras deste eido da cultura, a Comisión de Normalización Lingüística da Facultade de Filoloxía convoca o **II Concurso Literario Mazarelos**, nome que lembra e homenaxea as raíces da Facultade, e mesmo da Universidade e da propia Compostela, de acordo coas seguintes

BASES

1.- Participantes

Poderá participar o estudiantado que estea matriculado na USC en calquera momento do ano 2016 anterior á finalización do prazo de presentación.

2.- Obras

Admítese calquera xénero literario e calquera tema.

Os textos deberán ser orixinais, escritos en lingua galega, inéditos e non premiados noutros concursos. Tampouco non se poderán presentar a outros concursos durante o período desta convocatoria ata que se publique a decisión do xurado.

Cada participante só poderá presentar unha obra.

As/os concursantes deberán achegar unha declaración na cal garantan a autoría da obra e que os seus dereitos non están comprometidos nin pendentes de veredicto en ningún outro concurso literario. Esta declaración estará incluída no formulario de autoría que se publicará na páxina *web* da Facultade (<http://www.usc.es/gl/centros/filoloxia>).

Establécese un límite máximo de 30 páxinas DIN A4 mecanografadas, cunha extensión máxima de 9.000 palabras. Non hai límite mínimo.

3.- Entrega de traballos

As obras deberán presentarse nun sobre pechado dirixido ó enderezo *Decanato da Facultade de Filoloxía, avda. Castelao, s/n, Campus Norte, 15782 Santiago de Compostela*. A entrega poderase facer no propio Decanato e nos rexistros xerais da USC en Santiago e Lugo, ou ben por correo postal certificado ou nos demais lugares previstos na lexislación vixente.

No exterior do sobre pechado constará a mención “II Concurso Literario Mazarelos”. No seu interior achegaranse cinco copias da obra presentada ó concurso sen asinar e sen figuraren nela datos persoais e, ademais, un sobre pequeno, tamén pechado, co nome da obra e o lema ou pseudónimo do/a autor/a no exterior, e no interior o formulario de autoría que se atopará na *web* (<http://www.usc.es/gl/centros/filoloxia>) cos seguintes datos: nome e apelidos, número de documento de identificación, correo electrónico, teléfono de contacto e número de conta bancaria (IBAN) da cal for titular, así como o título da obra e lema ou pseudónimo.

4.- Prazo

O prazo de presentación remata na sexta feira (venres) 30 de setembro de 2016.

5.- Xurado

O xurado estará integrado por cinco membros elixidos pola Comisión de Normalización Lingüística (CNL) da Facultade de Filoloxía e nomeados pola súa presidenta. Tres deses membros serán profesores/as da Facultade, procurando que polo menos un/ha pertenza á área de Filoloxías Galega e Portuguesa. Os outros dous membros serán escritores/as sen relación actual coa Facultade. A/o presidenta/e será elixida/o de entre as/os profesoras/es polo propio xurado, que tamén elixirá a/o secretaria/o. A composición do xurado darase a coñecer na data de publicación da súa decisión.

A decisión do xurado será inapelábel.

6.- Resolución e premios

Establécense os seguintes premios:

1º premio: 500 euros e diploma.

2º premio: 250 euros e diploma.

3º premio: 150 euros e diploma.

Os premios están suxeitos á lexislación fiscal vixente.

A organización, a proposta do xurado, poderá declarar desertos algúns dos premios, ou, de se-lo caso, amplialos concedendo os accésits que considerar oportunos e que consistirán en diplomas.

A resolución do concurso será publicada na páxina *web* da Facultade de Filoloxía (<http://www.usc.es/gl/centros/filoloxia>) e tamén se lles comunicará persoalmente ás persoas gañadoras.

Valorarase así mesmo a posibilidade de publica-las obras premiadas.

Polo feito de participaren, os/as concursantes cédennle expresamente á Facultade de Filoloxía da USC os dereitos de uso, difusión, distribución e reprodución da obra presentada para a súa posíbel publicación nunha edición de carácter non venal, ou que responda a fins promocionais ou culturais.

Os traballos non premiados poderán ser recollidos polos/as autores/as no Decanato ata o remate do ano 2016. Unha vez rematado o ano, os traballos non recollidos serán destruídos.

7.- Entrega de premios

A CNL organizará un acto de entrega de premios, que se celebrará no mes de novembro ou decembro de 2016.

8.- Aceptación das bases

A presentación ó concurso implica a plena aceptación da totalidade das súas bases e do veredicto do xurado.

A CNL reserva para si o dereito de facer modificacións e tomar iniciativas non recollidas expresamente nestas bases, sempre que contribuíren á mellora do concurso e non alteraren a súa esencia.

A organización non se fai responsábel respecto a plaxios ou violación dos dereitos de autoría dos textos presentados, así como calquera outra transgresión da lei.